



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Constans Defensio, Ex S. Scriptvra, Et Vera Catholica
Doctrina, Atqve Observatione Vniuersalis Christianæ
Ecclesiæ Deliberationis de Christiana Reformatione**

Bucer, Martin

Genevae, 1613

De communione apud Missam 76

urn:nbn:de:hbz:466:1-34315

Verum sanè est, Ecclesiam habere potestatem in externis ordinationibus Domini dispensandi, moderandi & instituendi, & interdum, sed non nisi conuenienti tempore eas differendi, nunquã verò penitus tollendi vel immutãdi, quẽadmodũ Aduersarij in S. Cœna facere ausi sunt.

Cæterũ ex S. scriptura, ex doctrinã & exemplis Moïsis, Sanctorum, Prophetarum, Apostoli Pauli, & antiquorum verorum Episcoporum, beatorumque martyrum, inprimis verò ex allegata Epistola D. Cypriani, quæ tertia est libri Epistolarum secundi, non autem ab hominibus istis, qui omnia mandata Dei tam internas quàm externas res concernentia, tanta impudentia ac temeritate contemnunt, pedibusque conculcant, discere debent Christiani, quanti faciendum sit, quantaque diligentia obseruandum, quicquid externorum signorum & rituum Seruator noster Christus ipse nobis mandauit & instituit. Hactenus de isto articulo.

Sexta pars.

De Communione apud S. Missam. Virum S. Cœna sine communicantibus: & in vna communitate congregata plures, an verò vna tantum Cœna celebrari debeat: item an homines apud S. Cœnam absque Sacramentorum perceptione præsentibus adesse possint.

CAP. LXXVI.

LIBER Reformationis ordinauit, vt Pastores in vna communitate simul eodẽque tempore non plures quàm vnã S. Cœnam administrent, & vnũquemque populum ad Christianam sacramentorum communicationem fideliter hortentur. Cæterũ quòd melius hoc sacratissimum sacramentum ab omnibus fidelibus intelligatur, & in verum vsum perducatur, ordinauit, vt Pastores Dominicis tantũ & festis diebus vel aliàs cum tota Ecclesia Christi congregata est, S. Cœnam Domini administrent. Hanc ordinationem calumniantur & traducunt Aduersarij, recipiuntque in se probare, quòd non sit necessarium, vt singulis missis tota congregatio intersit: neque etiam oportere, vt omnes præsentibus simul communicent: sed posse missam piè celebrari, etiam si ad eam non tota ecclesia conueniat, simulque communicet. Atque hoc modo subinnuere volunt, quasi liber Reformationis doceat, Necessarium esse vt ad vnãquamque missam tota Ecclesia conueniat: nullãque celebrãdam esse, cui non tota communitas præsens intersit, ac simul communicet: id quod in Libro Reformationis nullibi positum inuenietur. Sed hoc in eo positum est, quòd iam antè cõmemorauimus, nempe vt missæ celebrentur, quando tota congregatio collecta est, vtque in eadem communitate non plures quàm vnã S. Cœna administretur: denique vt homines ad communicandum non cogantur, sed sedulò ac fide-

liter admoneantur: id quod Aduersarij ipsi exemplo Christi consentaneum, primumque & Christianum esse confitentur. Videat Christianus Lector, quid Liber ea de re tradat & ordinet.

Controuersia igitur inter Librum Reformationis & aduersarios quantum ad hunc articulum pertinet, his tribus quaestionibus continetur. Quarum prima est, utrum liceat S. Cœnam Domini sine communicantibus celebrare. Altera, Vtrum permissum sit, plures quam vnam missam vel Cœnam Domini simul eodemque tempore celebrare.

Tertia, Vtrum reprehensione careat, S. Cœnæ præsentem interesse, sacramenta verò non percipere.

Ad tres istas quaestiones omnes respondet Liber Reformationis vnà cum antiquis Ecclesiis, quæ adhuc verum intellectum vsuque huius sacrosancti sacramenti retinuerunt, sicut eum à Domino ipso per Apostolos acceperant, dicitque nullum istorum tum licitum ac concessum esse. Huius verò negationis euidentissimæ constâtissimæque causæ habentur in citatis locis Libri Reformationis, ex institutione Christi, doctrina D. Pauli, dogmatibus item, traditionibus & obseruationibus veteris Ecclesiæ productæ. Eas inspiciat, ponderetque Christianus lector simplici ac Christiana mente, & tunc iudicetur inter Librum Reformationis & Aduersarios.

Refutatio illius quòd Aduersarij pro errore & abusu suo introducunt, quo missam sine communicantibus celebrant.

De Communione apud Missam.

CAP. LXXVII.

PRIMUM argumentum quod pro abusu isto adducunt, est, Dominum hoc sacramentum propterea instituisse, ut quotquot vera fide & deuotione peterent, quoties eis videretur, aut necessitas requireret, ipso frui possent, qua in re nec multitudo, nec paucitas hominum, nec tempus nec locus eos remorari debeat. Sacerdotem igitur non malè facere, si solus sacramenta percipit, etiam si nemo cum eo communicet, si tamen non omittat admonere populum, ut ad communionem frequentius se preparat.

Alterum argumentum est, Communionem huius sacramenti non consistere in externa sola sumptione sacramentali, sed præcipuè in æterna spiritali, Et sacerdotem in S. Cœna non tantum orare pro præsentibus, verum etiam pro absentibus. Ad hanc thesin confirmandam citant S. scripturam de Cœna Dominica, sanctos item Patres, Augustinum, Ignatiû, Chrysostomum, & deinde dicunt, spiritualemente communionem, & orationem bene peragi, exerceri ac promoueri posse, sine sacramentali perceptione. Ac demum concludunt, Sacerdotem igitur posse missam celebrare sine communicantibus. Obseruet Christianus Lector cuiusmodi Theologi & dialectici sint Aduersarij.

Tertium